

## E Wunner muss her

Vor e paar Daach habb isch uffem Normaparkplatz moin Kummbeer Schorsch getroffe. Noochdem isch Gude gesaad hadd seeder: Aach Gude. Kumm, mir stelle uns in die Sunn, die dut unsern ahle Knoche gut.

E paar Schritt weider hawwe merr donn in de Sunn gestonne unn uns umgeguggd.

Hosdes gelese?, frächt misch de Schorsch, die hawwe joo dess Café hier zugemachd, omm Verrzehnde, war doo nix mehr los?

Ich saach: Isch habb gelese, dess hädd nor noch Geld gekost, unn doo hawweses lie-wer zugemachd.

No ja, moont de Schorsch, dess hier iss aach koon Platz ferr e Café, hier iss joo nix los, im Geeschesatz zu dene Cafés in de Kolonnade. Ess iss halt enn Unnerschied, ob vill Geschäfte in de Näh sinn odder nitt.

Isch habb geniggd unn saach: Isch denk, der Platz hier dut koo Auswärdische oolocke, unn ohne Auswärdische konnsde nirschendwo e Werrtschaft odder e Café betreiwe. In de Kolonnade unn unne omm Moo iss dess onnersd. Doo kumme aach Leit vunn wer waaß woher hie, omm Moo guggese sisch um, in de Kolonnade kaafe se oi unn wennse genuch geguggd odder oikaaft hawwe unn sisch setze wolle giehse in oo vunn dene Werrschaffde omm Moo odder in die Cafés in de Kolonnade. Hier mitte in die Stadt, in die Altstadt, kimmt kooner vunn auswärts. Merr misst was hawwe, dass die Leit hierher kumme.

Honnes, seet de Schorsch, konnsde disch erinnern, wie isch dess Modell gemacht habb mett dere Pendelbohn vumm Moo bis hier unn enaus in die Kolonnade? Wenn dess gebaut werrn deet wärn merr bekonnd in gons Deitschlond unn vill Leit käme her unn deede sischs oogugge.

Du host recht, Schorsch, habb isch gesaad, hier misst was bassiern. Odder wenn die dess neie Rothaus baue missde die su enn Kelteferrsch ...

Was ferr ooner?, frächt de Schorsch, iss dess ooner vumm Bofrost?

Naa, saach isch, su enn Ferrsch wie der mett dene grüße Ohrn im Voochelsberrsch.

Ach enn Ferrsch, rieht de Schorsch, wie hawwe merr gesaad: Gieh nitt zu doim Ferrsch, wennde nitt gerufe werrsch!

Ja, saach isch, su ooner, dess deet enn mords Ufftrieb gewwe. Merr kennt joo ooner uff alt mache unn in e Loch leesche unn donn deet merrn finne.

Oh ja, rieht de Schorsch, odder in dere Kapell doo driwwwe deet e Wunner bassiern, doo käme die Wallfahrer her.

Egal, saach isch, ob Pendelbohn, Kelteferrsch odder e Wunner in de Kapell, doodemett kenndmerr mords Reklame mache unn hier de Platz, wener donn aach koo Lescher mehr hädd, der wär voll mett auswärdische Leit.

De Schorsch seet: Omm bessde wär e Wunner. Doo käme die Meisde.

Isch habb gegrinst. Also e Wunner muss her, aach doo kenndmerr joo e bissi noochhel-fe. Donn kenndmerr den Platz hier aach Marienplatz nenne, wie isch schunn immer ge-saad habb.

E Wunner!, seet de Schorsch, Mensch, was kenndmerr doodemett ferr e Reklame ma-che.

Isch habb noch mieh gegrinst. Ja, e Wunner muss her. Awwer ess wär joo schunn emol e Wunner, wenn die Bleichstrooß endlich ferrdisch gemachd deet werrn, nor doodemett konn merr koo Reklame mache. Eiern Honnes.